

Fung Saenq Hawj Yaucangj Ndeu

贵港市覃塘区蒙公镇高占小学六年级 Vangz Maucinz/黄茂晨

Veiz yaucangj gingqgyaez:

Mwngz ndei! Ngoenzneix gou daeuj nyauzluen mwngz lo, hawj mwngz daez di genyi ndeu, hawj hagdangz raeuz bienq ndaej engqgya gyaunde. Lajneix dwg gij siengjap gou, cingj mwngz nyinhcaen dingq.

Mwngz hix rox, seizeix hagdangz raeuz aen “Suen Dajndaem” cungj dwg ndaem go’ gva, ndaem go’ duh caeuq go’ byaekheu, lij ndaem go’ oij caeuq haeuxyangz daengj doenghgo. Aenvih daihgua cungj laihnaeuz “ndaw singz ndaem gova, lajmbanj ndaem go-byaek”, ndigah, hagdangz raeuz mbouj ndaem gova. Gou nyinhnaeuz: Cingq aenvih lajmbanj raen va noix, engqgya wnggai ndaem, neix youq hagdangz lajmbanj youh dwg lingh aen fungh- gingj moq ne. Doengh go’ byaek gooij dwg daegsaek lajmbanj, hoeng gij doenghgo neix rog doenghnaz miz hauj lai, lwgnyez youq gwnz loh byaij daeuj hagdangz haenx cungj ndaej yawjraen. Vihliux hawj daihgua yawj funghgingj, gou dajsuenq dawz go-byaek caeuq gova doxcab mdaem, hawj aen suen dajndaem engq yienjok

“gwnzsingz lajmbanj doxgap”, gou miz seiq aen siengjap baihlaj:

Aen daih’ it dwg genj song gaiq reih baihdoeng dieg namhbiz daeuj ndaem gova. Lw roengzdaej ne, couh youq gyang reih ndaem go’ byaek, youq henz dinreih ndaem gova ndei dajleix haenx. Ndaej ndaem va’ gut, vayezgi, varibfwngz daengj. Yiengh-neix, gij va neix ndaej dangguh dinsuen, youh ndaej hawj daihgua yawj suenbyaek seiz, youh lai ndaej yawj aen gingj ndeu, caen dwg sim soeng da sangj lai lo.

Aen daihngieh dwg song gaiq reih ndaem gova haenx, ceiq ndei dapbungz, hawj gaeu gova ndaej raih, lumj valahbah, gaeusaidoengz, va-ciengzveih, sam cungj va neix minghgeng, dingj ndaej nonhaih, va hung youh lengj, saek ronghsag gyaunde, yinx lwgda vunz, hawj vunz sim maez raixcaix. Daegbied dwg gaeusaidoengz caeuq vayezgi, sam seiq cungj saekva daxcab, maj ndaej gig vaiq.

Aen daihsam dwg ndaem va le, ceiq ndei aeu bwnhranz daeuj dwk,



lij youq henz laeb gaiq baiz: “Cingj mwngz gaej sieng sim gova”, yienghneix ndaej yawj va, youh ndaej son’ gyauq gyoengq doengzhag gyaec doenghgo sengmingh.

Aen daihseiq dwg faen hawj gak ban doengzhag dajleix, hawj gyoengq doengzhag sim haenh guhhong, ndaej rox “guh hong ceiq miznaj”.

Baihgwngz neix dwg gij siengjap

gou, maqmuengh yaucangj dawz haeuj sim.

Cukhoh mwngz:

Ndang cangq, yienghyiengh cungj ndei!

Gauhcan Siujyoz loeg nienzgaep it ban Vangz Maucinz

Bi 2019 ndwen 6 ngoenz 18
(lauxsae son’ gyauq: Veiz Gyanghbingz/韦江萍)

Duzlingz Iq Yungzheih Lumz Saeh Haenx

上林县大丰镇中心学校四(2)班 Veiz Gyah/韦嘉

Duzlingz iq gig coengmingz haengj hag, hoeng de dam saj, gingciengz lumz guh saeh, ndigah daxmeh gingciengz ndaq de.

Miz baez ndeu, duzlingz iq cuengqhag ma ranz, daxmeh cam de: “Haemh neix miz gijmaz cozyez aeu sij?” “Miz……miz……” Duzlingz iq lumhlumh gyauej, naj hoengz dwk gangj: “Daxmeh, gou lumz lauxsae anbaiz gijmaz cozyez lo.” Mehlingz dingq le fatheiq dwk naeuz: “Baezbaez cungj dwg yiengh-neix, guhcaemz mbouj dingq lauxsae gangj, youh aeu gou daj denva cam lauxsae, lauxsae cungj nyap liux lo, mwngz mbouj najmong gou cungj najmong liux lo. Haemh neix gou mbouj caiq daj denva hawj lauxsae, mwngz gag siengj banhfap ba.” Duzlingz iq dingq le, rox swheigj guhloek le, gouz daxmeh naeuz: “Daxmeh, cingj mwngz caiq hawj Yiengz lauxsae daj baez denva ndeu, baez neix gou caendang cam Yiengz lauxsae.” Mehlingz mbouj miz banhfap, cij ndei daj denva hawj Yiengz lauxsae. Duzlingz ciep denva cam: “Yiengz lauxsae, gou lumz dingq haemh neix sij gijmaz cozyez lo, cingj mwngz caiq lwnh gou nyi, ndaej lwi?” Yiengz lauxsae youh caiq lwnh duzlingz dingq, lij naeuz duzlingz: “Duzlingz, mwngz ngoenzngoenz daj denva cam cozyez mbouj baenz, mboujne mwngz cawx bonjbouh ndeu, dawz gak cungj saehcingz geiq youq ndaw bonjbouh, danghnaeuz mwngz lumz saehcingz le, couh hai bonjbouh yawjyawj.” Duzlingz iq raen neix dwg banhfap ndei, couh yienghneix guh lo. Daj seizhaenx heij, duzlingz iq guhsaeh couh miz diuzleix lo.

Miz ngoenz ndeu, daxmeh bae cawx doxgaiq, duzlingz iq youq ranz yawj saw. “Dinghlingling……” denva yiengj lo, duzlingz iq ganjmuengz bae ciep denva, yienzlaiz dwg mehgx naeuz:



Mehgx naeuz: “Duzlingz iq, ngoenz neix gou bae ranz mwngz guhcaemz, lwnh meh mwngz 9:00 daeuj hojcehcan ciep gou.” Duzlingz iq han le, couh youq ndaw bonjbouh geiq “9:00 bae hojcehcan ciep mehgx.”

Mehlingz ma ranz le, duzlingz iq naeuz: “Daxmeh, mehgx hawj mwngz 9:00 bae hojcehcan ciep de.” Daxmeh dingq le han: “Ndei.” Ciepdwk youh cam: “Mwngz seizlawz geiq saehcingz ndaej cingcuj baenzneix?” Duzlingz iq riu naeuz: “Gou dawz gij saeh neix cungj geij coq ndaw bonjbouh bae lo.” Gangjsat, duzlingz couh dawz bonjbouh neix hawj daxmeh yawj. Mehlingz baez yawj, va! Ndaw bonjbouh de geiq hauj lai saeh ndaej deihaenyaen. Mehlingz haenh de guh ndaej deng, duzlingz iq riu lo.

Daj seizhaenx heij, Duzlingz iq yungzheih lumz saeh haenx menhmenh bienqbaenz duzlingz coengmingz lingzleih youh dwggyaez.

(lauxsae son’ gyauq: Vangz Gveiyangh/黄桂香)

Lwgcaeg

Boh ha, mwngz iq lumj gou seizde, dwg baenzlawz ne? Daxmeh mwngz moeb mwngz lwi? Daxmeh mwngz moeb mwngz seizde, mwngz goj daej ma?

Mbouj rox ma? Boh ha, saeh ndanggaeuq mwngz cungj mbouj rox ga?

Lumz gvaq lwma? Boh ha, mwngz vihmaz mbouj geiq youq ndawsim ne?

Gvaq nanz lai lwma? Gij saeh seiziq geiq youq ndawsim de, gvaq nanz lai le, couh mbouj miz saekdi lwma?

Dahraix ha? Seizgan dwg lwgcaeg, de rox caeg gij saeh geiq youq ndawsim haenx deuz bae ma? Nyaenx mwngz vihmaz mbouj re di ne, boh ha! Seizeix, gou deng lai re di bw, gou coj mbouj hawj seizgan daj ndawsim gou caeg gij saeh gou roxgeiq de bae.

(Daj 《Bonsei Sim Lwgnyez》 (Veiz Gizlinz raiz) senj okdaeuj, Lwgfwnz-meh/卢奋长 hoiz)

